



**Kalaallit Nunaanni sivisuumik suliffissaaleqisut ornittagassaannik pilersitsisoqarnissaa siunertaralugu periarfissamik iluaqutaanik aamma ajoqutaanik misissuisoqarnissaannik ukiakkut 2020 saqqummiussaqqassasut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut Ilaasortaq Jens NapätôK', Partii Naleraq)

Inatsisartunut ilaasortap Jens Napaattuup aaliangiiffigisassatut siunnersuutaanut, qulani pineqartumut qujalluta, matumuuna Inuit Ataqatigiinniit imaattumik oqaaseqaateqassaagut.

Qanga Grækerit filosoffiisa ilaat – isumaliutersullammaasa ilaat tassalu Sokrates imatut oqarsimanerartarpaat; Akissutaasoq akissutaagallartarpoq, akissutissap nutaap pitsaanagerusup takkunnissaata tungaanut.

Tassa imaappoq isummerfigisaq sunaluunniit allanngorsinnaasarpoq, ilisimasat paasisallu nutaat takkussimaleraangata. Tassa imaappoq, isumaq, akissut, suliarluunniit sunaluunniit pitsaanerullunilu pitsanngorsarneqartuarsinnaavoq, Sokratesip oqariartuutaa paasilluarsimagaanni.

Apeqqummullu Majorissamut tunngasoq assersuutissatsialassuurtut isigaara Sokratesip oqariartuutaanut tunngatillugu.

Naluneqanngitsutut Majoriaq pileqqaarami Piareersarfimmik taaguuteqaqqaarsimagaluarpoq, naluneqanngitsutullu 1.august 2016 aallarnerfigalugu Piareersarfiit tamarmik Majorissamik taaguusersorneqalersimallutik.

Naatsumik oqaatigalugu Majorissap suliassaasa ilagaat suliffissaaleqisut ingerlariaqqinnissaanik siunnersuineq, qaffassaaneq, pikkorisaanerillu. Siunertat anguniakkallu pitsaasut ajunngilluinnartullu. Aap, siunertat anguniakkallu pitsaasut pitsanngorsarneqartuarsinnaasulli soorlu isumaliutersullammasuaq Sokratesip aamma taama oqariartuuteqarsimasoq.

Taamaattumik inatsisartunut ilaasortap Jens Napaattuup aaliangiiffigisassasut siunnersuutaa oqariartuutaalu paasilluarsinnaallutigu, soqutigilluinnaqqissaaratsigulu Inuit Ataqatigiinniit oqaatigisinnaavarput.

Jens Napaattuup siunnersuutigaa qallunaatoorlugu Aktivitetscenterit pilersinneqassagaluarpata pitsaaqutai pitsaanngequtaanillu misissuinissaq. Aktivitetscenter immaqa kalaallisut Sammisassaqaqtitsivik ornittakkamik taaneqarsinnaavoq. Suliffissaaleqisunit

sammisassaqtitsivittut ornittagaasinnaasoq. Orniinnarnaguli aamma sammisassaqtitsiviusinnaasoq sunik assigiinngitsorpassuarnik, piffimmiit piffimmut nammineq ilusilersorneqarsinnaasoq; Suliffissaaleqisup suliffissaaleqeqatiminik naapeqateqarfigisinnaasaa, sammissaqarfigalugu, kialaarfigalugu kaffisorfigisinnaallugulu.

Uagut Aktivitetscenter taamatut takorloorparput. Tassa Majorissaminngaaniit allaanerussutaa; Majorissamut saaffiginikkaanni taamaallaat; naqitsittoqarsinnaavoq, qinnuteqaatinik immersuisoqarsinnaavoq, siunnersorneqarsinnaallunilu allamillu naamik.

Suliffissaaleqisunut Sammisassaqtitsiviit ornittakkat pilersinneqarneratigut iluaqutissartai makkuusinnaapput;

1. Suliffissaaleqisut ulluinnarni ullaakkumiit katerisimaarfissaqalissapput, ornittagaqalersinneqassapput katersuuffissaqalersinneqassallutillu.
2. Suliffissaaleqisut Sammisassaqtitsivik aqqutigalugu aqqissuussaanagerusumik ataqatigiissakkamik, pilersaarusiorkluakkamillu ingerlariaqqinnissaminut siunnersorneqarsinnaalissapput, sammisassaqtinneqartalissapput, suliassaqtinneqartalerlutillu, soorlu ilaatigut makkuninnga; Utoqqarnik sullissinerit, utoqqaat illuinik aputaajaassinerit, utoqqaat illuaniittunit aneerussinerit – illoqarfimmik eqqiluutsuutitsineq, inuiaqatigiinnik kiffartuussinerit, aserfallatsaaliinerit allarpassuarnillu.
3. Taassuma saniatigut suliffissaaleqisunit førtidspensionistinit utoqqartartinnillu pisinnaanerusunik naapeqatigittarfittut kialarfittut atornerqarsinnaasaaq.
4. Kantinalerneqarsinnaavoq taamaalilluni kommunimi sulisut aamma tassani ullueqqanut neriartorfissaqalersillugit. Unnia kommunimi kantina matuniarpalulersoq.

Aktiveringscenteri Majorissap ataani ingerlanneqarsinnaavoq. Imaluunniit killormut Majoriaq Aktivitetscenterip ataanut inissinneqarsinnaalluni.

Suliffissaaleqisut amerlasuut aningaasanik tigusartagaqaannaratik, ullaat tamaasa ornittagartarnisartik ullullu tamaasa suliassinneqartarnissartik kissaatigaat. Inuunertik nuannerneruqqullugu isumaqarneruqqullugulu. Aktiveringscenterip pilersinneratigut qularinngilara suliffissaaleqisut kissaatat taamaalilluta piviusunngortissinnaasagipput.

Taassuma saniatigut aamma kissaatiginaraluassusaa sammisassaqtitsiviit pilersinneqarnerata kingorna, sammisassaqtitsiviit taakku pineqatut, unnukkut seniorklubbitulluunniit aamma ammatinneqartarsinnaanissaat; soorlu 18-ileereersimasuniit qummut unnukkut sukisaarsaartarfittut – sammisassaqtitsivittut atornerqarsinnaasunngorlugulu. Ullutsinni imigassartorfiunngitsumik 18-ileereersimasut unnukkut sukisaarsaartarfissaminnik amigaateqarput. Taassuma pilersinneqarneratigut amigaataasoq taamaattoq aamma matussuserneqarsinnaasagaluarpoq.

Sammisassaqtitsiviit pilersinneqassagaluarpata, qanorlu ilisulernerneqarsinnaanerat eqqarsaatigalugu piffimmiit piffimmut assigiinngitsumik aqqissuunneqarsinnaasoq Inuit Ataqaatigiinniit upperaarput.

Taamatut naatsumik oqaaseqarluta, Jens Napaattuup siunnersuutaa ataatsimiititaliamut susassaqtumut ingerlateqqipparput, apeqquiti qulaani pineqartut ilanngullugit nalilersuiffigineqarsinnaaqullugit.

Qujanaq

In.in.

Peter Olsen